

Date – 09/03/2026

Time - 7:30 -7:40 Hrs

AKASHVANI AIZAWL

REGIONAL NEWS BULLETIN

HEADLINES (MORNING)

1. Vawiin chawhma dar 10 leh a chanve atanga Assembly Budget session chhonzawmin Mizo tawng India Constitution Schedule 8-na a dah tura rawtna official resolution sawiho a ni ang.
2. Chief Minister Pu Lalduhoma'n Pukpuia Engineering College chu Academic Session thar atanga bultan thei tura ruahman ani a ti a, Lungleia State University tur pawh tan thuai tum ani tih a sawi.
3. Prime Minister Narendra Modia chuan nimin khan New Delhi-ah hmasawmna project cheng vaibelchhe sing thum sang thum leh 500 hu a hawng.
4. Nizana ICC T20 World Cup 2026 final inkhelah India chuan New Zealand hnehin an champion..



ASSEMBLY SESSION

Vawiin chawhma dar 10 leh a chanve atanga Assembly Budget session chhonzawmin Mizo tawng India Constitution Schedule 8-na a dah tura rawtna official resolution sawiho a ni ang.

Vawiina Assembly Session tan a nih hunah darkar khat chhung chu zawhna leh chhanna hun atana hman a ni ang a. Chumi zawhah chuan Finance changtu Chief Minister Pu Lalduhoma'n Economic Survey, Government of Mizoram 2025 – 2026 a pharh ang a. Education Minister Dr. Vanlalhlana'n India Constitution schedule pariatna angin Mizo tawng hi India ram tawng zinga pawm ni se tiin resolution a pulut ang a.

Minister pahnih Pu PC Vanlalruata leh Pi Lalrinpuii te an department chan a sum hman tur ruahman sawiho a ni ang. Pu PC Vanlalruata department chan a sum ruahman hi cheng vaibelchhe 242, nuai 63 leh sing 7 senna tur Agriculture & Farmers' Welfare, cheng vaibelchhe 18, nuai 81, sing 4 sang 3 hmanna tur Cooperation leh cheng vaibelchhe 99, nuai 70, sing 8 leh sang 3 hmanna tur Irrigation & Water Resources, a vaiin cheng vaibelchhe 361, nuai 15, sing 9 leh sang 6 hman tur ruahman te a ni. Pi Lalrinpuii department enkawl a sum ruahman chu cheng vaibelchhe 909, nuai 29, sing 9 leh sang 6 hmanna tur Health & Family

Welfare leh cheng vaibelchhe 326, nuai 90, sing 7 leh sang 9 hmanna tur Social Welfare, Women & Child Development, a vaiin cheng vaibelchhe 1,236, nuai 20, sing 7 sang 5 hmanna tur ruahmanna te a ni.

<><><>

GAS PRICE HIKE

Mizoram sorkar Supply Department chuan Divisional LPG Sales Head, Indane Divisional Office, IOCL Silchar atanga lehkha a dawn hmangin tun lai khawvel hmun hrang hranga geo-politics boruak avanga India ram chhunga eirawngbawlina gas (LPG) lakluh man a to chhoh thu leh, IOCL-in LPG man zat a ennawn thu a dawng a. March 7 atangin domestic LPG cylinder (14.2 kg) man chu India ram hmun dang angin Mizoramah pawh bur khatah cheng 60 in tihsan a ni a. Mizoram District zawng zawngah domestic LPG cylinder 14.2 kg rate thar cheng 1,065 chu March 7 atangin IOCL bithliah angin hman tan a ni ang.

<><><>

CM

Chief Minister Pu Lalduhoma'n Pukpuia Engineering College chu Academic Session thar atanga bultan thei tura ruahman ani a ti a, Lungleia State University tur pawh tan thuai tum ani tih a sawi.

Mizoram University Convocation vawi 20-na ah he thu hi sawiin Pu Lalduhoma chuan Mizorama zirna hmasawn theih nan theihtawp an chhuah thu sawiin zirna hmun tam zawk din anih theih nan kawng hrang hrangin sawrkar chuan hma a la a ti a, Mizoram State University chu bultan thuai tum ani tih sawiin hun rei tak chhunga National Institute of Technology rambuai chu chinfel ani tawh a ti a, zirna hmun hrang hrang atangin mithiam tam tak chher chhuah ani chu hmasawna anih thu a sawi.

Pu Lalduhoma chuan Mizoram sawrkar flagship scheme Handholding chu thalai, mahni kea ding tura theihna leh thiamna neite tana buatsaih a nih thu sawiin, scheme hmang tangkai turin thalaite a sawm a. University naupangte ni chung a Mizoram University-in NIFR 2025 ranking-ah India rama University tha 82-na a hauh pha chu chhuanawm a tih thu a sawi.

Mizoram University hi kum 2001 khan din niin, tun dinhmunah Department 39 a awm a. Centre 2 te'n School of Study 10 ah UG, PG leh Ph.D programme an kalpui mek a. Affiliated College 40 leh Constituent College 1 a nei mek bawk.

<><><>

ASSEMBLY-FISH

Luidung (Capture sector) lampang tihmasawna tur leh chak zawk leh hlawk zawka kalpui a nih theih nan sorkarin hma a lak mek thu Fisheries Minister Pu Lalthansanga'n a sawi.

Tun lai Assembly inkhawm kal lai a Pu Jeje Lalpekhluah zawhna ziaka chhangin Fisheries Minister chuan Indian Council of Agricultural Research (ICAR) hnuai a Central Institute of Fisheries Education (CIFE) Mumbai te nen thawk hoin Mizoram State Fish, 'Nghavang' (Semiplotus Modestus) chu a chi siam dan tur leh khawi pun dan turte zir chianna nei tura hmalak mek a nia ti a. Khawtlang leh tlawmngai pawlte'n luidung an humhalh mekte chu a khawtlang leh sorkar in hlawkna an tel theihna turin hmalak chhoh mek zel a ni a, nghakuai inchiahsiak buatsaih thinte pawh hun bik siama mumal zawka kalpui tum a niin, sangha inthlahpun hun tibuai lo tura ruahmanna siama kalpui zel a ni bawk tih a sawi.



ASSEMBLY-LAND

Sorkarin Lengpui leh Sihphir khaw ramah Indian Air Force hman tur ram lakna atana hriattirna chhuah chu chanchinbu a tihchhuah a nih loh thu Land Revenue & Settlement Minister Pu B. Lalchhanzova'n Assembly a hrilh.

Pu C. Ngunlianbunga zawhna ziaka chhangin Minister chuan Ni 15 May 2025 khan Preliminary Notification chhuahin ram lak tum a ni a, Final Declaration Notification hi ni 22 July 2025 ah chhuah a ni a. Chanchinbu-ah erawh notification hi chhuah a ni lova, Aizawl DC pisa Notice Board ah tarehhuah a ni a ti. Chanchinbu a chhuah a nih loh chhan sawifiahin Lengpui leh Sihphir a mimal ram 115 acres Indian Air Force hman atana ram lak (acquired) hi LR&S hriattirna May ni 15 2025 anga kalpui a ni a ti a. He hriattirna hi the Right to Fair Compensation and Transparency in Land Acquisition, Rehabilitation and Resettlement Act, 2013 section 11, section 9 leh section 40-na ram la tura hmanhmawh thlak bik thil (Special powers in case of urgency to acquire land in certain cases) hnuai a chhuah a nih vang a ni, a ti.

Hei bakah hian Lengpui leh Sihphir a mimal ram lak tur hi section 40-Special Urgency Clause Notification anga hmalak a nih avangin, India leh a thenawm (Bangladesh/Myanmar) ram ramri venhimna atana pawimawh (Defense strategic matter) a ni a. India leh Pakistan buaina avanga Operation Sindoor ni 07.05.2025 a kalpui hunlai leh State huap a Mock drill te pawh neih hun lai a nih vangin, a sensitive em em a chu mai bakah ram neitute thlan fel tawh leh no objection certificate (NOC) lak vek tawh a nih avangin puan zar tul lo leh ni lo zawng a a darh palh hlauh vang liau liau a chanchinbu a puanzar a ni lo a ni, a ti a. The Right to Information Act, 2005 Section 8(1)(a) hnuai hian ram venhimna atana pawimawh (Defence strategic matter) documents te hi mipui hnena pe chhuak lo turin hriatthiamna a pe a ni a ti bawk.

The Right to Fair Compensation and Transparency in Land Acquisition, Rehabilitation and Resettlement Act, 2013 Section 40 ang a za zela 80 zangnadawmna pek a nih hnu a a la bang za zela 20 zangnadawmna pek a nih hma a a hmunhma endik (site verification) tumna-ah pawh hian Indian Air Force lam hian ram neitute, pawl hrang hrang, Village Council leh lirthei khalhtute pawh verification awm tur chungchang hrilh hriat an duh lo a. Chumi rual chuan Lengpui

Airport hralh tum ang a mipui (public) lamah thu belhchian dawl lo a than nasat vang a ni, a ti bawk.

Zawhna dang chhangin Pu B. Lalchhanzova chuan pawisa pek a nih dan chu July ni 25, 2025 khan Henry Lalremsanga Hlawnmual chu cheng vaibelchhe 117 nuai 90, sing 2. sang 6 leh 341 pek a ni a. Hemi ni vek hian Rohmingliana hnenah cheng vaibelchhe 32, nuai 41, sing 9, sang 4 leh 731 pek a ni a ti a. Rohmingliana hi August ni 26, 2025 khan cheng vaibelchhe 37, nuai 58, sang 5 leh 269 pek leh a ni a. Sihphir a ram neitu 8-te chu May ni 13 leh August ni 26, 2025 khan pek an nih bawk thu a sawi a, mi 8-te hnenah pawisa pek zat hi a vaiin cheng vaibelchhe 8, nuai 46, sing 5 sang 3 leh 291 a ni.

<><><>

ASSEMBLY-TOURISTS

Nikum chhung khan ramdangmi khualzin 11,484-in Mizoram an rawn tlawh.

Budget Session neih meka zawhna Tourism Minister Pu Lalnghinglova Hmar-in a chhannaa tarlan a nih danin, kum 2024 chhung khan Mizoram-ah khualzin mi nuai 4, sing 2, sang 7 leh 302 an awm a. Heng zinga nuai 4, sing 2, sang 1 leh 888 chu India mi (domestic tourist) an ni a, ram dang atanga Mizoram lo tlawhtu mi 5,414 an awm a ni. Nikum, 2025 chhunga Mizorama khualzin lo lut zat chu nuai 8, sing 4, sang 1 leh 322 an ni a, heng zinga nuai 8, sing 2, sang 9 leh 838 chu India mi, domestic tourist an ni a, ram dang mi (International Tourist) 11,484 an awm.

Zawhna chhannaa tarlan a nih danin, Mizoram Sorkar-in tourist hrilhfiagna a nei lo a, United Nation World Tourism Organization (UNWTO)-in tourist a hrilhfiagna chu Mizoram Sorkar chuan a ring a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni. Vawiin chawhnu dar 2 leh a chanve-ah Chanchinthar puan leh a ni ang.

<><><>

PM

Prime Minister Narendra Modia chuan nimin khan New Delhi-ah hmasawna project cheng vaibelchhe sing thum sang thum leh 500 hu a hawng. Thusawiin Pu Modia chuan India khawpui lian bera hmanrua leh hmasawna ruhrel awmte tihchangtlun zel anih thu sawiin a theih anga tihlen zel a ni a ti a. An project hawn takte chuan inkalpawhna a ti changtlung ang a, mipuite tan khawpuia chen a ti awlsam lehzual dawn a ti a. Metro section hawn thar chuan khawpui cheng mi maktaduai chuang tan nasa takin hmasawna kawng a hawng dawn a ni a ti bawk.

<><><>

PARLIAMENT

Vawiinah Parliament Budget session thawhnhnihna tan a ni dawn a. Lok Sabha ah chaun Speaker Om Birla ban phutna motion sawiho a ni dawn a. He motion hi Congress Memembr pathum Mohamed Jawed, K Suresh leh Mallu Ravi ten house ah an pulut dawn a. He motion hi sawihona hi Speaker Om Birla chuan a kaihruai dawn a. Memberte zingah a thu ve dawn ani.

<><><>

T20 WORLD CUP

Nizana ICC T20 World Cup 2026 final inkhelah India chuan New Zealand hnehin an champion. T20 final hi Ahmedabad-a Narendra Modi Stadium ah khelh a ni a. India hian vaw hmasa in over 20 ah run 255 an siam a. New Zealand te hian over 19 ah run 159 siamin an out fai vek a ni. President Droupadi Murmu, Vice President Droupadi Murmu, Vice President D P Radhakrishnan leh Prime Minister Narendra Modia te chuan India team te chu ICC T20 World Cup an champion avang hian an lawmpui thu an sawi a ni.

<><><>